

吳  
興  
藝  
文  
補

吳興藝文補卷之二十八目錄

陳潤祖

烏程人

採菱渡石記

爲郡人沈監運

揭侯斯

送張懋實歸省吳興序

贈筆工溫國寶序

郡人

章子端字說

章紳郡人

吳師道

雲石山房記

爲趙集賢從子明仲

跋趙子昂書東坡詩

跋趙子昂帖

題潘默成贈方仁聲詩後

仁聲名

趙明仲所藏姚子敬書高彥敬詩

姓子敬名武歸安凡

題牟成父所作鄧平仲小傳及濟邸事略後

成父名應

龍

張世昌

烏程人

崇順菴蘭若記

烏程閔德淵建于墓傍

貢師泰

掌故集以爲寓公考其年譜及神遊碑未嘗及

黃學士文集序

黃潛

跋松雪招隱詞

跋趙書亭詩

三真觀記

在長興

一經堂記

李木魯翀

湖州路安定書院夫子燕居堂碑銘

宇文公諒

歸安人

文昌宮程氏舍田記

郭主簿去思碑

歸安

南潯長生講院碑跋

釋智及

趙魏公書楞嚴長偈跋

張師古

觀魚亭記

爲歸安陳耕隱

徐顯

沈烈女小傳

郡人

余闕

貢泰父文集序

泰父名師泰

楊維禎

寓公

毛隱上人序

郡人

沈氏今樂府序

沈子厚郡人松志悞收之

郊韶詩序

郡人

濯纓亭志

亭在雪溪

吏部侍郎貢公平糴記

貢師泰行子吳興

玄妙觀重建玉皇殿記

在郡城

長興州重建學宮記

順寧庵記

爲長興吳成叔

東湖書院修造田記

在長興

素履齋說

爲郡人呂坦

倪用宣字說

倪燦郡人

江浙平章三旦八公勲德碑

平湖寇

釋元旭

石屋禪師塔銘

清珙見前

倪瓚

題良常草堂疏

捐捨趙榮祿正書一卷

跋環慶王氏所藏趙榮祿碑六帖

宇文材

郡人

筆卦

有叙。爲吳興筆者陸生。

危素

大元故翰林侍講學士中奉大夫知制誥同修國

史同知經筵事贈中奉大夫江西等處行中書

省叅知政事護軍追封江夏郡公謚文獻黃公

神道碑

黃潛

宜興無極導禪師塔銘

奉母築菴于弁山

戴良

送丁山長序

郡人丁子儀

跋錢舜舉所臨閭立本西域圖

跋趙文敏所臨蘭亭序

無名氏

贈吳興筆工

吳興藝文補卷之二十八目錄

終

吳興藝文補卷之二十八

烏程董斯張遐周彙編

閔元衢康侯叅輯  
韓昌箕仲弓增定

採菱渡石記

陳潤祖

監運沈君玉泉得異石於石林葉氏之廢圃廉而不劇  
聳而不屈黝然其光蒼然其色若干將出匣而未加磨  
礪也前後刻曰採菱渡其陽字二行王摩詰石虛用中  
書皆有印文復刻摩詰詩於下方云採菱渡頭風起策  
杖林中日斜杏樹壇邊漁父桃花源裏人家與集字稍

異意爲輞川舊物而立於採菱渡者其景猶可槩見夫  
物固有無脛而能走千里者珠玉是也蓋爲世珍貴易  
於包挈也石之爲物盤盤囷囷嶄嶄巍巍非百斛之舟  
數十夫之力莫能致世之嗜好之者不啻珠玉牛李之  
黨徧天下交相詆毀如冰炭品甲乙戒子孫嗜石如出  
一轍五季之亂委沒于荒烟蔓草之中瓦礫等耳茲石  
也踰關河涉淮江來止于吳昔牛李之石皆自太湖而  
西是石乃自西而南特爲世所愛重豈非摩詰之風流  
文采照映後世神物亦或護持使然歟於是扣石而問

之曰爾能決浮雲揮黑蜮驅旱魃而致豐年之祥乎能  
斬佞臣誅姦宄雄三軍而爲府庫之重乎石不能言乃  
酌酒而爲之歌曰秦關百二兮鬱嵯峨秋風吹渭兮水  
揚波望故都兮渺何處白雲飛兮芳草多載歌曰城郭  
異兮人民非輞川千里兮何時歸照玉泉兮安且壽花  
溪之樂兮與君子而相依郡人陳潤祖爲之記

送張懋實歸省吳興序

揭傒斯

吳興古稱水精宮蓋極山川之明秀而言近若魏國趙  
文敏公又能專其秀者也其爲書爲詩爲畫皆本朝第

一至書之於篆自李斯而下未能或之先也魏國常爲  
余言吳興之人多學而不屑于仕及科舉行始稍稍有  
之然舍科舉無見也其又賢而秀者曰張君懋實數以  
其藝試有司不効乃束書入京師京師之人貴者交之  
賢者友之少者師焉監察御史察其才薦爲侍儀舍人  
宰相不能用奎章閣章士悅其學奏爲國子生天子從  
之而人猶以爲屈也居久之思其母若兄謁告而歸祭  
酒司業而下皆是其請又賞之以文章以厚其歸以爲  
諸生勸夫學固所以明人倫也入其學行其道所謂士

也自君之入京師每過余與之語常恐其去之速誦其詩讀其文常恐其易盡余今年踰六十食五品之祿而不能去君方盛年又始爲國子生一思其親翩然而歸余不及君遠矣魏公所謂多學而不屑於仕者不其信歟然魏公所以早見稱于天下者乃其華非其實也魏公通經術而不能授之以政魏公明律呂而不能使之正雅樂故魏公非不用而實未嘗用也以其華之勝也觀君之才終當自致青雲之上宜專求其實勿自誤於華也而孝弟固其本矣以君之待我厚於其別故贈之

以言後至元二年歲在丙子三月朔揭傒斯序

贈筆工溫國寶序

揭傒斯

吳興多名筆溫國寶其最後出者天曆至順間余在奎章閣有以其筆獻余者視之毫短而過肥余曰是令人書善癡而多肉試之信然繼有獻者無不盡然余告之如初人徃徃習聞余說遂不敢復獻旣而嘆曰彼獻者且非善書徒取價廉而費約聊藉以隨俗作人情耳惡能得其善筆哉其後二三年頗復有獻者其製作旣異其病亦無復前日獻者其數愈少其筆愈善且獻而善

者必其能書者自是凡有自吳中來者余必求溫氏之  
筆而愈不可多得矣今年春余以使事過錢塘始識其  
人與之坐以前言告之溫作而曰吾一筆工耳豈不欲  
極其材之良盡其藝之精以取名聲於天下哉而凡來  
求吾筆者惟欲其價之廉數之夥夫價欲其廉數欲其  
夥而又求吾善筆雖國工不能爲已且吾非有先世之  
資負郭之田所以隱忍而爲此者庶得自食其力其身  
安其志平上無忝於祖考下無累於妻子終吾生而已  
耳吾非欺世而盜名者人不求吾之善筆也且吾筆之

價有倍之者有五之者有十之者而一視之是以罷牛之價而求千里之馬也其可乎天下非無善筆求之者不以其道也因獻其善筆且進曰此猶未也此特所謂倍之五之者然視京師最後之所得者又有間焉由是言之天下之得善筆者寡矣而溫氏之言亦可感矣乃并書以贈之

章子端字說

揭傒斯

吳興章紳字子端宋兩世宰相之後純雅而有志求余說其名若字之義大帶謂之紳玄端謂之端皆古朝服

夫服玄端垂紳儼然而立于朝可謂得事君之禮矣不知事君之道得乎否乎未能事君必先知事親未能事親必先知修身知修身而後可以事親知事親而後可以事君知事君而後可以澤加於民是故德不稱服身之灾也服不稱德君之過也君子寧使服不稱其德不敢有歉于服焉子毋曰端未之服也紳未之垂也已旣名而人字之矣必當惕然曰使我誠一日端紳而立于朝將何以稱之乎毋廢學毋躁進毋厭貧賤必求所以稱之者其說

具六經子試求之

雲石山房記

吳師道

吳興望西浙今集賢趙公以詞翰著又爲郡之望而一門俊秀林立播風流而挹芳潤往往絕類他族莫之抗吾友明仲其一也明仲於公爲從子其序益親人益勝藝事賞好尤異間嘗語余曰昔先大父蓄一異石高數尺廣如之素質浮瑩奇勢層涌如片雲然不知何從得也易世來故家遺物此猶獨存吾嘗葺藏修游息之所而植于其前因以雲石名之子能爲吾述其槩乎余觀萬有在天地間一物自爲一形而不能以相混惟雲與

石也不然雲之行空也浮游歛忽而不主一體石之在地也殊詭錯雜而不限一態千變萬化獻巧出奇隨衆形以爲形而無窮今君之所蓄其雲耶其石耶孰得而定之也然而雲氣也聚有而散無石質也一成而不潰立而不改是雖無情而氣行乎中安知其非雲之所附歟夫天地之道一動一靜而已動資乎靜靜主乎動互根而不相離子不觀夫雲之起石乎膚寸之觸毫縷之泄蓬然而垂天油然而雨天下渙然而解寂然而無而石固自若以爲石靜而未始不動也以爲雲動而未始

不靜也子於其間亦知其所以然之故乎知乎此者天地之道不外是矣明仲雋敏有才非徒游蕪而玩物歸休乎是居整衿而晏坐試以是觀之

跋趙子昂書東坡詩

吳師道

東坡先生月夜飲酒杏花下詩風致流麗神情灑落子昂每愛書之亦其平生有契焉耳予評趙公之書當如蘇公之詩不知覽者以爲何如

跋趙子昂帖

吳師道

子昂學士自其尊公去吾里久旣自著其望爲吳興矣

觀其答陶士元書既以得叙親情話爲慰又以見相燭  
鄉物喜不自勝藹然桑梓之情猶足以厲薄俗獨恨某  
晚生小子不反一識之面耳

題潘默成贈方仁聲詩後

默成名良貴

吳師道

默成潘公送方仁聲詩前有序云公吾里人客寓吳興  
神情散朗如晉宋間高士晚得官無仕進意築庵西溪  
名曰雲茅以衛生養性爲事詩文雄深雅健追古作者  
凡二百餘言稱重甚至真蹟藏柳道傳博士家按方公  
名勺當政和乙未年已五十是時士之稍以才藝名者

有岐路可競進而超然高舉如此豈非賢乎所著泊宅  
編十卷行世泊宅在烏程相傳張志和浮家泛宅之所  
因號泊宅翁蓋志和亦金華人而寓吳興者二人志操  
出處畧同真足以相配而無愧顧世罕知之或以爲嚴  
瀨人者未之考也

詩已別見

趙明仲所藏姚子敬書高彥敬詩

吳師道

房山高尚書與吳興姚先生人品高勝故其詞章翰墨  
自有天趣此卷姚書高詩詩似王維張籍書自楊凝式  
上訴王大令使人想見其翛然埃壒之表宜夫二人者

之相得爲深也某於高公聲迹不相及子敬則間東西  
州皇慶中有孫伯芳者出子敬所書陸氏館中諸詩及  
手選樂府一帙小楷極精欣慕之甚嘗作詩送孫以未  
章致意暨趙君明仲往來吾州則知子敬爲詳而明仲  
亦且過稱予以欺子敬交以未識爲恨耳泰定初明仲  
來爲常山簿相見則曰子敬亡矣爲言其一月前似疾  
非疾屏居敷山中絕食惟日飲水曰人腸胃穢惡皆食  
所致吾將以是蕩滌而潔清之家人來候者悉遣歸留  
一子侍明日語之曰汝知之乎男子不死於婦人之手

命扶起坐而逝烏乎其死生之際如此世之知之者特  
未耳明仲以予雅敬之故見輒道子敬事謹識而不忘  
時距其歿已七年今又十八年矣明仲子肅攜此卷來  
京師邀予題因記前語明仲見之能無感乎

題牟成父所作鄧平仲小傳及濟邸事畧後

吳師道

隆山牟君成父之父祖仕宋皆有列於朝君早侍左右  
凡典章故實具能言之號稱博洽此其書鄧平仲及濟  
邸事以遺曹士弘者蓋士弘以史事自任故屬之如此

吳曦之誅實楊巨源結李好義舉義之功爲安丙輩媚  
忌揜沒今陳監丞衆仲跋語舉以爲言當矣前代記曦  
之事詳者惟李心傳嘗讀其朝野雜記亦畧于巨源近  
有續陳桎宋編年者頗載巨源事而多舛錯雖能書安  
丙殺其叅議官楊巨源而復以擅殺孫忠銳之罪歸之  
大槩當時功歸于丙故其事不白惟俞文豹吹劍錄具  
載巨源本末併所撰詔書及丙與彭輅謀奪巨源兵令  
樊世顯殺之于大安城下又言其妻子流離困苦狀使  
人憤惋蜀多義士編年亦並載平仲之志壯矣使牟君

不記世未必知之也史彌遠廢濟即罪狀明著宋季諸  
公文字班班可見鄭清之乃自附于善類者故牟君特  
發其隱耳韓昌黎所謂誅奸諛于旣死發潛德之幽光  
牟君所記二事有焉然予又嘗見方回跋某人寶慶錄  
謂濟即切齒楊后彌遠所爲於是彌遠與后密謀廢之  
彌遠旣訪求得理宗楊后欲見其人因策士曰令理宗  
入內庭后于簾中審視之計遂定今牟君謂寧宗崩彌  
遠夜召理宗入使楊谷楊石白后后持不可七往返以  
危言脅之乃從與方所記異以事推之方記當是也予

曠昔好聽遺老之談說見稗官野史有可以備紀述者  
輒不忍棄如俞方所云皆錄藏于家今不能悉記姑誦  
其畧以附焉吁牟君子不及識今不可復作矣吾儕之  
晚出者亦且老後來尚復有談及此者乎良可慨已

崇順庵蘭若記

張世昌

繇吳興而東皆平川沃野其俗淳龐儉勤故治業易滋  
養生送終得以盡心而無憾有古之遺風焉違城一舍  
許曰屐溪者閔氏世居之家裕而文爲鄉望族至友山  
公德淵克揚先志以儒術自修嘗被省檄典教歸安公

雅性曠達慕馬少游之爲人謝事家居絕意進取每遇  
風日清淑則游眺徜徉自適其樂一日至宅之東北視  
其地勢阜隆川流環拱嘆曰美哉斯丘吾將擇兆以葬  
焉於是叅諸地理謀于耆龜罔不協吉遂營壽藏與厥  
配許氏爲同穴之規復相其傍結精廬以安諸僧衆中  
爲佛殿挾以兩廂像設莊嚴供物完好奉先有室會食  
有堂筵賓有館寢庫庖湏百用咸備并割田土貳頃有  
畸以給祀事廩食之需經始于延祐庚申越明年至治  
辛酉成謁名於翰林承旨子昂趙公公曰吾知先大夫

中山素稔世以積善著聞今子復廣其心志壽瑩之作  
又能盡於人事皆順之大者也宜名之曰崇順卽大書  
扁額以贈又五年泰定丙寅友山具經營始本來訪余  
云是當有制以垂將來寧久不以輕屬人蓋有待也願  
爲記之余聞古人重本而安土篤於始終之道族間長  
者周身慎行足爲後進法雖出而仕然老必返其鄉沒  
則祭於社習俗之厚可知已後代家無定業人無定心  
僑寓徙移亦生人之常理欲求數世不遷安居殖產如  
閔氏者幾希矧夫友山公欲以全歸爲重豫圖掩藏之

計嚴謚精詳足以貽諸永久斯固宜書尚俾後人念其  
致力之勤及所以命名之義克敬克戒以繼祚於不朽  
順理無違天祐以吉則閔氏之宗愈蕃而愈顯其墳廬  
彌久而益光是則斯文之有助豈徒誌歲月而已哉友  
山曰此吾心也因書以爲記

黃學士文集序

貢師泰

翰林侍講學士金華黃先生文集總四十三卷其初藁  
三卷則未第時作監察御史臨川危素所編次續藁四  
十卷則皆登第後作門人王禕宋濂所編次也先生之

文章剗剗澡雪如明珠白璧藉之縑者但見其光  
瑩而含蓄華縟而粹溫令人愛玩嘆息之不已而不知  
其致力用心之苦也故其見諸朝廷簡冊之紀載山林  
泉石之詠歌無不各得其體而極其趣以自成一家言  
余嘗論之文章與世運同爲盛衰或百年數十年輒一  
見先生當科目久廢之餘文治復興之日得大肆力於  
學以擅名於海內雖其超見卓識有以異於人其亦值  
世運之盛也譬諸山川之風氣草木之花實息者必復  
悴者必榮蓋亦理勢之必然夫豈偶然而已哉先生領

延祐甲寅鄉薦先文靖公實爲考官於師泰有契家之  
好其後同居史館又同侍經筵交誼尤篤比廉問問南  
過金華得先生之集於王禕故叙而授之三山學官俾  
刻梓以惠來學先生登進士第授將仕郎台州寧海縣  
丞歷石堰塲監運諸暨州判官浮沉州縣幾二十年始  
入翰林應奉文字尋丁外艱服除改國子博士居六年  
以太夫人春秋高乞外補遂提舉江浙儒學年六十有  
四竟辭歸養以中順大夫秘書少監致仕及復召入  
翰林侍經筵數年老不許久乃得謝去今年七十有九

猶康強善飲啖援筆馳驅如壯歲云

跋松雪招隱詞

貢師泰

王右軍果止於善書而已耶人於趙魏公亦云今觀所書招隱詞爲之慨嘆

跋趙書帝詩

貢師泰

世稱帝詩出陶趙書出王或謂自是蘇州詩吳興書信然否當有辨之者

三真觀記

貢師泰

三真觀在長興州四安鎮石礪之麓距鎮西北二里許

穹林深池左右聯屬里人周貴謙與弟進元善信實始創焉中殿像真武神及神之父曰明真母曰瓊真祠祭之法甚謹且備嗣天師聞而喜之以神與父母爲三而事神者兄弟亦三豈偶然哉遂題觀以今額號貴謙曰迪真明悟守道法師進元曰清真守素明真法師善信曰凝真守一崇道法師師之先世在宋嘗數舉進士第至師寢微因躬力田治生家復饒已而嘆曰何爲是囂囂以勞吾形歟乃盡捐其家以爲觀衣草食木絕去五味與仙人隱士相羊棲息乎其中而有徒之來日亦衆

師繼委蛻明遠清逸宏教法師教門高士陳君守中實  
嗣之於是益拓其疆址增其土田崇其門墉廣其屋廬  
復於殿之左廡起殿者四楹以祠東嶽右廡亦如之以  
祠三官祠皆像天神地祇鬼物仗衛嫫毐魚龍飛走百  
怪之狀撞鐘擊鼓笙磬互答簪星帔霞環佩瑤鳴祈禳  
奔走神人翕和而邦域之內益少水旱疾癘之苦矣余  
聞真武者北方黑靈玄冥之神也其星虛危其象龜蛇  
危上高旁下如蓋故類龜虛上下如連珠故類蛇合二  
者之名曰玄武玄武七宿實主過行罰增年延德列於

四司載於六宗自昔祠官方士往往先焉宋避祖諱易  
玄爲真而後真武之號行今并以神有父母曰真豈世  
傳襲之久而道書又傳襲之耶然函三爲一太極之真  
也自一而三人性之真也能不溘其真斯不亦長生久  
視之道乎若是則觀名三真亦奚疑哉况我皇元肇基  
朔漠水德之符厥有攸緒其主祠北方玄武之神又豈  
無所本哉元紹甲戌之歲余以江浙相府掾驛過吳興  
間謁陳君山中見其神完氣和論議灑然已竊異之及  
見其徒費君惟正潘君元德張君自戍李君至堅興弟

于揖讓進退各共其職夫然後益知陳君之賢果能有  
以服其人也明日衆皆前曰觀始創於至元庚寅被旨  
優護於延祐戊午迄今凡四十有五年而規制儀文庶  
克少備獨始末未記敢請以垂久遠余時雖固辭而心  
則已許之矣別去十年南北之望愈遠而陳君之請愈  
勤至正甲申夏將理刑會稽道出鎮上陳君迎笑上手  
曰礪石待子文久矣余赧焉無以應退即舟中爲書其  
故且貽詩三章俾歌以媚神曰神之來今連蜷修輿熙  
兮後先容穆穆兮離帝前闕光景兮俾民無愆神之駐

一經堂記  
貢師泰  
兮旂黑黑雲黯黯兮垣圉則披髮伏劍兮威以力享庶  
幾兮籩豆有式神之返兮旆差差盼嚮乎兮玄螭諧樂  
將徹兮亟顧懷烈騰上下兮降福孔皆

一經堂記

貢師泰

一經堂者海昌朱肅齋氏名以訓其子叅政周公伯溫  
所書也肅齋之子鎡從余游間致其父言請爲之記余  
謂六經並載聖人之道何獨取於一經哉豈不以漢常  
賢嘗以一經敎子故耶不然則將先明一經而他經從  
可明矣夫經之目有六曰易書詩春秋禮樂或道陰陽

或紀政事或詠性情或正名分或以正行而和心雖其  
爲說不同而其道則未嘗不貫于一也自三五以降歷  
世益遠然其立訓垂教不過數十言而止至吾夫子贊  
序刪正更加述作上以紹前聖之既往下以開後學之  
方來人文可謂極盛矣實亦不過數百卷而止爾以數  
百卷之書明數十言之旨簡易精潔如天地運行如日  
月照臨其道未嘗不廓然而公粲然而明也及秦漢諸  
儒各出已見務爲專門論議詆訾朱紫混淆其簡冊之  
多棟充牛汗旣以湮塞聖道磔裂經旨不可究極矣而

近世科目之設則又餌之以著述誘之以詞章盡之以  
記誦假之以經術遂使海內之士疲精竭力靡然向風  
恣爲新奇之言巧飾頗僻之見一切逢迎苟合以邀進  
取而六經始爲釣功名利祿之具矣嗚呼大道之晦一  
至于此可勝嘆哉向非周程張邵朱呂數君子者出孰  
能發微言于既昧之中尋墜緒於不傳之後乎而今之  
學士大夫執其全書因以潛觀默識旁通曲暢則亦幸  
矣然有讀書萬卷而終身無一言之得者有得一言之  
要而終身守之不失者其故何也道之明與不明而已

是故明經所以明道道門則經無不明者而錄也又文  
公諸孫強志善學其庶幾得于此矣不然雖日誦六  
經猶爲無益况一經哉

湖州路安定書院夫子燕居堂碑銘

李木魯翀

今上皇帝鑑舊制誥萬方優儒蠲役復其家元統三年  
湖州安定書院山長張蔚以夫子燕居堂室陋隘率儒  
衆鳩工徙徙基而北堂隆序拱增壯曩昔恒廩不損推  
羨置禾畝六十有三蔚言宋淳祐五年湖守蔡節始闢

書院創屋楹四百七十置米畝二千先聖之室侍以顏  
曾安定之祠傳習之館皆循矩矱九峯蔡氏紀其績雙  
峯饒氏主其教道化大行至元二十三年祠院鄰寺勢  
奪權徙游氏魚樂亭三十年守許師可卽北城觀德坊  
市屋五十餘楹院始定今燕室加崇子適至敢請記以  
白悠遠邇聞宋三章閣待制安定先生胡文昭公瑗以  
蘇湖教授師太學其志務在洗滌賈藝干利之習復先  
王之舊其教卓然有造士風天下宗之英才育焉與泰  
山孫明復徂徠石守道皆有師道學者稱曰三先生程

明道兄弟之所傳雖自濂溪來伊川游太學聞三先生之教遂厭科舉知其傳之正也先生家泰州望安定教湖學久卒葬烏程今郡縣書院猶古黨術之庠序也學者報本必祀先聖先師聖尊而師親師必鄉賢於泰於湖皆築書院泰先生父母之鄉湖其桐鄉歟抑嘗泰位辟雍蔚國子生也旣爲序之敢附雅頌明聖朝之治正吳越之風辭曰

維山有松可斷可度維水有藻可采可芼由宮而門由堂而室柱礎桓桓邊豆秩秩瞻仰玄聖申申天天顏說

曾唯天朗日昭繼是孰先孫思鄒孟以俟後覺其傳者  
正安定生世千古寥寥濡導洙泗于雪于茗貞我皇元  
覆幬持載敎澤四克滋益光大太湖之府安吉之鄉流  
風遺韻古今洋洋弓長氏蔚鼓舞士衆義順事宜崇此  
梁棟材以資世學以育才繩繩繼繼用鑑靈臺

文昌宮程氏舍田記

宇文公諒

蜀梓潼神祠遍天下而吳興獨後宋景定辛酉肇祀於  
貢院之左魁星樓當前文筆峰對峙信斯文發祥之地  
時吳蜀大夫士咸出貲以助其成龍圖文簡程公大昌

之孫吏部郎中端升其一也事見殿撰清忠牟子才之  
疏九十餘年矣代遭神聖光啓賢科褒以綸章錫以殊  
號甚盛典也今祠宮僅存而無以給重修之費乃至正  
辛卯吏部公之孫昭德與其子道復娶皆楊氏請以奩  
田五十畝入官充用可謂能繼先志矣府推李公毅叅  
謀趙公渙烏程縣元納古赤公實勸成之官給文據以  
爲永圖仰稱國朝右文興化之意道士馬道常請爲文  
以記予惟梓潼神靈無乎不在自今斯文之慶施乎郡  
人延及程氏之後詎可量哉乃系以詩曰張翼降精蒼

姬毓英移孝爲忠赫赫厥聲昉自坤維誕裨神化炳炳  
人文光被華夏郡城崇崇雪水流東巋然祠官面峙華  
峰自昔名賢德業相望文簡有孫家聲夙尚舍田奉祀  
神豈我私蒸我髦士斯文在茲

趙魏公書楞嚴長偈跋

釋智及

梵語首楞嚴此翻一切事究竟堅固良由慶喜未全道  
力求佛方便故世尊示之以十方如來一門超出妙莊  
嚴路乃至多方決擇真妄發明陰入七大皆如來藏使  
悟器界萬法當體全真銷億劫顛倒妄想獲究竟堅固

法身於是說偈讚佛發願度生虛空可亡心無動轉實  
爲微妙章句松雪居士趙魏公大書特書以傳不朽書  
法之妙大海爲口須彌爲舌贊莫能及而公出處光大  
名滿天下碩德盛業不可思議得非楞嚴會上菩提薩  
埵乘大願輪一來人間遊戲者歟公非獨書是偈至若  
金剛般若圓覺諸大乘經皆勵精書寫鈐梓流布將此  
身心奉塵刹是則名爲報佛恩浮俗聞提觀此亦當自  
化

郭主簿去思碑

宇文公諒

簿以佐令勾稽符籍糾正非違均一政賦皆其職也然  
簿與令賢否不同則事有從違吏緣爲姦上下其中而  
盜病矣必令簿俱賢則同寅協恭彼此無間吏不敢欺  
而民受其惠若歸安簿郭君彥章是也歸安爲吳興望  
邑土沃民庶風淳賦足自昔號爲易治比歲兵燹相仍  
徵歛無藝民且告病而治之者良不易矣縣尹遼東魏  
侯賦平訟理父老徵予文刻石記之而郭君以才名爲  
當道薦辟椽浙省父老復爲之請夫簿之善政猶令之  
善政也舉凡教督勸課獄訟賦役受納差科政之善者固

非一而民受其賜者亦非一然惠非要譽也廉非沽名也况供億煩勞公勤靡懈賊退而不有其功民歸而各安其業此其善政之實夫豈溢美也哉於是監郡通議公始下車方以守令舉而省檄至矣非名實相孚何能感人若是其速耶故書以遺來者君名普顏益都膠西人事毋以純孝稱其先大夫嘗爲臨漳知事從浙省官勦賊南勝歿于王事追贈從事郎中都路卽墨縣尹君以恤典承蔭初授南安路南康簿再調茲邑持論正直所至有聲行當展其才力登陟清峻其進固未易量也

京兆宇文公諒謹述邑父老意作詩以頌之其辭曰  
君馬之良兮君佩陸離式遄其驅兮毋逶遲歸安壯邑  
兮其疆百里簿頌政成兮吾民樂只我作此詩兮歌以  
頌之匪我君兮邑人之思

南潯長生講院碑跋

宇文公諒

長生講院肇于勝國建炎間殿宇宏敞金碧煒煌鼓鐘  
振揚爲一方之勝尋值兵燹靡有孑遺住持靜覺禪師  
戒律專確有聞於時嘗悼象教之陵遲懼緇流之失所  
爰募善緣不復舊觀以其名勒石道側噫見于羽者想

舜德觀河洛者思禹功微師之精勤不足以動人之樂  
施又奚足以成師之巨費者哉斯亦可尚也已師歿後  
數稔其徒普仁謂余與師有支許之好因乞一言以傳  
永久余故爲識其後使後之嗣師者慎無替師之志云

觀魚亭記

張師古

夫魚之爲物一鱗族之微耳嘗聞其或化而爲龍或變  
而爲鵬若有變化不測之象者何其神歟蓋以天地之  
氣有通塞而萬物之生且育於其中者有動靜之殊而  
魚之潛見因之矣然則魚之神也其理不有可窺者耶

茗溪之南爲東林里有陳翁號耕隱者築室於錦峯之  
西有隙地數畝種莖插柳有溪鑿池蓄魚嘗請魏人趙  
彥徵作史籀文於楣至正庚子翁館予於亭上俾子若  
孫受業於其中暇則捲簾隱几魚咸在目竊見夫陰飈  
駭而玄氣凝池水涸而岸沙瘠潛藏隱伏莫知所有當  
天地閉塞之時此魚之所以致靜也又見夫冰雪潰而  
春濤生轟雷擊而蟄戶啓揚鬐奮鬣若騰若舉當天地  
開泰之時此魚之所以變動也要之動靜互爲其根致  
靜者乃所以爲變動之機變動者乃所以爲致靜之地

而造化之顯諸仁者藏諸用理固然也昔人有言渾身本是先天易闔眼無非太極圖今於亭而觀魚焉二氣之通塞萬物之動靜而神化之妙盡在目中之所謂先天易太極圖固不必他求也予與二三子朝斯亭也夕斯亭也豈徒恣於觀覽而無得於道理也耶他日諸子乘風雷之鼎轟而竊比於九二之見龍未必不自斯亭得之也遂書以記之

沈烈婦小傳

徐顯

吳興千涇沈氏者同里邵氏婦也夫邵爲軍士所害沈

氏有殊色虜置快舡上溪流迅急乘間躍身投水中舡  
去疾意其已沒不及顧適張掾舟過之見鬢髮如雲被  
水面視之乃婦人衣淥水上不能下沉死卽引救之問  
乃知其姓與其里居易衣置後艦內使守視之其下踰  
之曰汝遇吾張君幸得不死張掾今貴人汝能事之且  
更得福勿憂也沈氏謝曰幸諸君見憐欲活我吾見吾  
夫被創甚吾心已許之恨不及生時使之見也且張君  
欲我安用失節婦人哉遂噤不復言度勢不可出視其  
旁有竹箸一束夜二鼓自以箸納口中面力觸舟箸入

嗾以死明日張爲歛而焚之予至吳興張爲予言如此  
論曰丙申之變婦人之死多矣其死有二焉或迫於威  
或懼其辱感慨於一時有羞惡皆能之至於患難交于  
前利欲誘於後屢變而益堅委命以遂志惟明於義者  
乃能有以處此而沈氏以纖弱之姿矢死靡他其節尤  
異雖古烈丈夫何以加焉向使入水以沒則已無聞矣  
而幸君見之豈天憫其貞烈使傳於予以表見于世哉

貢泰父文集序

貢係  
寓公

余 闕

余天性素迂常力矯治之然終不能入繩墨矯治或甚

則遂病不能勝因思以爲迂者亦聖賢以爲美德遂任  
之一切從其所樂常行四方必迂者然後心愛之而與  
之合凡提機變者雖強與之然心終不樂也故暫舍而  
輒去京師天下聲利之區也迂非所宜有嘗陰以求之  
士大夫之間得一人焉曰貢泰父泰父故學士仲章君  
之子能詩文少游太學有時名因自貴重不妄爲進取  
有所不可交者亦不妄與交故我二人者驩然相得若  
魚之泳于江獸之走于林也時泰父爲應奉翰林文字  
固多暇日卽與聚榼有蔬一品魚一盤飲酒三行或五

行卽相與賦詩論文凡經史詞章古今上下治亂賢否  
圖書彙器無不言者意少適卽聯鑪過市據鞍談謔信  
其所如而止及暮無所止則相與問曰將何之皆曰無  
所之也乃各策馬還自古暨今王公貴人能求賢常少  
然自至元初姦回執政乃大惡儒者因論當國者罷科  
舉擯儒士其後公卿相帥皆以爲常然而小夫賤隸亦  
皆以儒爲嗤詆當是時士大夫有欲進取立功名者皆  
強顏色昏且往候於門媚說以妾婢始得尺寸此正迂  
者之所不能爲也因翺翔自放無所求於人已而皆無

所遇予既歸淮南泰父亦以親嫌辭官歸除紹興推官  
不相見者爲最久去年太原賀君爲丞相蒐羅天下人  
才之有政譽者而泰父之治爲浙東西第一廼得復召  
爲應奉余適入朝爲待制相見益歡計其別十年矣吾  
年少於泰父鬚髮皆白而泰父銳然面紅白如常出其  
別後所爲詩文甚富且大進益知泰父真豪士也夫以  
士之賢無所遇而淹于下僚宜其悲憤無聊而不能盡  
也顧乃自樹卓卓以其餘力而致勤于文學且其貌充  
然非其中有所資蓋不能爾然則吾泰父之迂又過我

遠矣夫古之賢士多不兼於文藝文藝雖卑而世方貴而傳之者愛其人故也不賢者之於文藝雖極其精人猶將賤之亦何以爲也泰父忠孝人也其功名事業當不待文與詩而傳而況於兼有之耶余昔與之別今見其文如此今又當別去計相見時又必有過此矣於其行也序而識之

毛隱上人序

楊維禎

客有沙門以金錫杖荷青襖窠謁予雲間次舍合者問其出吳興儒士子也問其業縛筆也予恠縛筆非沙門

事則曰予祖禰業予弗忘其先也且自矜生而穎悟六  
歲善讀書史日記萬餘言長而善草隸諸書誦於父命  
爲浮屠而俚浮屠惟以習歌唄擊鐃考鼓利人死喪爲  
事無所用吾善書記者遂服先業自號毛隱蓋將附穎  
而逃吾浮屠氏之趾也且可挾以見世之賢人君子如  
閣老青城先生尚及見之而喜予之爲且貽予以詩云  
幸願見夫子也竊嘗誦夫子三史統辨數千言至今口  
不忘予覆其流誦沛然若大江之流奔決無少哽也於  
是異其人曰人生之初受魄於陰鬼盛者多善記昌黎

稱毛穎善記亦豈非以其明眎之裔奔月合太陰之精  
受鳧爲尤盛故爾耶上人以毛隱自號非徒欲祖穎裔  
而又將傳穎心至於博纂洽記述爲文章資世之賢人  
君子以文明昌天下乎不然何舍子浮屠事而復見其  
先業以僕僕走文章家之門乎若是則上人之志有所  
歸而未信可知已用上人之伎者毋徒用於字書官府  
市井貨泉之法記釋老巫覡之書鈔而已也抑昌黎言  
毛穎有時而禿不任事遂以謝老退且有中書不中書  
之議吾將還子顛毛返子儒永冠萬一剡諸鴻生碩士

聽受指畫俾克冠之際毋得以老退議子者子以爲何  
如上人避席載拜曰夫子倘有意褊拭我我將加巾冠  
載筆以從至正九年十二月會稽楊維禎序

自跋曰予爲此文後上人者遂愴然爲賈浪仙故事  
言之不可已也如此儒之才日衰折而入浮屠家如  
毛隱者多矣謹錄似方外友覺隱玉岡雲谷諸公發  
一笑云

沈氏今樂府序

楊維禎

或問騷可被絃乎曰騷詩之流詩可以絃則騷其有不

可乎或又曰騷無古今而樂府有古今何也騷之下爲  
樂府則亦騷之今矣然樂府出於漢可以言古六朝而  
下皆今矣又況今之今乎吁樂府曰今則樂府之去漢  
也遠矣士之操觚于是者文墨之游耳其以聲文綴于  
君臣夫婦仙釋氏之典故以警人視聽使癡兒女知有  
古今美惡成敗之勸懲則出於關雎氏傳奇之變或者  
以爲治世之音則辱國甚矣吁開雕麟趾之化漸積於  
聲樂者固若是其班乎故曰今樂府者文墨之士之游  
也然而媒雅邪正豪俊鄙野則亦隨其人品而得之楊

盧滕李馮貫馬白晷一代詞伯而不能不游於是雖依  
比聲調而其格力雄渾正大有足傳者邇年以來小葉  
俳輩類以今樂府自鳴往往流于街談市諺之陋有漁  
樵歛乃之不如者吾不知又十年二十年後其變爲何  
如也吳興沈子厚氏通史善爲古歌詩間亦游於樂府  
記子數年前客太湖上賦鐵龍引一章子厚連和予四  
章皆倣鐵龍體飄飄然有凌雲氣心異之今年予以海  
漕事住吳興者閱月子厚時持酒殺與今樂府至至必  
命吳娃度腔引酒爲吾壽論其格力有楊盧滕李馮貫

馬白諸詞伯之風而其句字無小葉俳輩街談市諺之陋關庾氏有傳子厚氏其無傳吾不信也書已成帙求一言以引重因爲論次樂府之古今爲沈氏今樂府序至正十三年夏四月十日會稽楊維禎序

郊韶詩序

楊維禎

或問詩可學乎曰詩不可以學爲也詩本性情有性此有情有情此有詩也上而言之雅詩情純風詩情雜下而言之屈詩情騷陶詩情靖李詩情逸杜詩情厚詩之狀未有不依情而出也雖然詩不可學詩之所出者不

可以無學也聲和乎中正必由於情情和乎中正或失於性則學問之功得矣或曰三百篇有出於匹夫匹婦之口而豈爲盡知學乎曰匹夫匹婦無學也而游於先王之澤者學之至也發於言辭止於禮義與一時公卿大夫君子之言同見錄于聖人者非無本也我元之詩虞爲宗趙范楊馬陳揭嗣之繼者疊出而未止吾求之於東南永嘉李孝光錢唐張天雨天台丁復項炯毗陵吳恭倪瓚蓋亦有本者也近復永嘉張天英鄭東姑蘇陳謙郭翼而吳興得鄒韶也韶詩清麗而溫重無窮愁

險苦之態蓋其強力於學聖人諸子氏之書無不畢究者亦且二十餘年矣韶年尚盛而學未止深其本之所出極其作之所詣蓋得騷之情則騷之聲得雅之情則雅之聲矣又豈在元詩一人之數追逐李張丁項輩而止乎韶勉之而已其詩成帙者若干卷

濯纓亭志

楊維禎

有三客者會於雪溪之上濯纓之亭各陳所歌詩以白所志一客謠曰桃花一窠三三歲不識人間漢秦世溪上漁郎何處來溪水東流復西逝一客謠曰荷爲衣兮

辟爲蓑飲沆瀣兮餐朝陽山蒼蒼兮水泱泱懷美人兮  
天一方一客謔曰我所思兮思故人堯舜之主皐蕤臣  
箕之顛兮頴之濱飲牛豈棄巢由民又謔曰盤則圓兮  
枘則方尺有所短寸有長文武之道一弛張龍伸夔屈  
安厥常謔闕以質濯纓主人主人曰一客之辭逃世之  
士之所志也二客之辭喪君之士之所思也三客之辭  
一隱一顯與時推移之士之所爲也如用之吾從三也  
歟三客者退錄其辭者鐵崖道人會稽楊維禎主人者  
爲中臺中丞公吳鐸也

吏部侍郎貢公平糴記

楊維禎

至正十二年春三月中書吏部侍郎貢公奉詔使江浙  
民陷賊者曲宥之刑殘之家免以土賦朝廷又慮餽餉  
不繼賑貸不給發內帑錢三十餘萬錠俾公於稔地與  
民和糴公抵吳興諗民有儲粟者聽自陳糴凡六萬有  
畸於時直益其十之二先付直後納所直粟且下令曰  
朝廷以和爲義官不得齊刑吏不得抱案差若等以三  
之與若一以和爲義官府始笑之曰民疲久矣悍卒扣  
門叫囂猶不卽奉命令若此事其可集耶公曰民爲爾

給者殊多矣吾今以誠待之彼亦以誠應我旣而民果聽命相與議曰逞時物輸官而直不給雖給且垂橐而歸今公先與直毫髮不以干有司吾何幸也復與平斗斛使輸粟者自槩司庾不得高下其手縣吏與豪民有假是以漁獵者公微得之皆置之法父老以手加額曰公之爲政吾前未之聞也廼相與請其求書其事于石以爲平糴後法予惟管仲有輕重之權李悝有地力之敎而平糴之法出焉大要裒多益寡稱初平施使民適足而已歷代祖之漢曰均輸曰常平唐始置和糴使宋

有傳糴使糴之科皆爲美制而任之不得其人則亦無異于強取也今公以內帑錢若干不親有司之散歛親與民市告以信令民之聽之若子聽父不三日飛艚輓舶填塞津隘米積于地概不暇給未越月廩入於永寧泰定民不知擾而粟以盈數蓋得和糴之本法而足以宣上德意也豈非朝廷任得其人之效歟不然彫城瘵郭富家豪室轉在草野救死且不贍何所取財而云和糴哉此其事爲可書也已漢耿壽昌以平糴便益賜特爵關內侯公入覲吾見公之得賜爵也雖然賜爵一已

利耳吾聞公有篋中書凡一綱二十目皆切於議大政  
大利害而天下資以爲治者條陳于上實吏部獻納  
職也嘻此其利吾人者可一二計哉又南父老之至望  
也公名師泰字泰父宣城人起身胄監嘗爲名御史云  
時浙江行省檢校李思義以省委東來相糴事而郡監  
赤思哈公與有勞焉故共書之

玄妙觀重建玉皇殿記

楊維禎

吳興玄妙觀在子城西北一百五十步爲郡官寮祝釐  
禱雨暘之所本梁太同二年所建玄風觀也唐神龍改

龍興天寶改開元宋初改玄通大中祥符改天慶我朝  
改今名崇建聖殿以居昊天上帝至正六年殿災提點  
錢道元聞人得仁廼與處士施道清勇發弘願各竭已  
資且募檀施得若干緡錢於是首建聖殿經始於七年  
秋越明年夏六月告成肥楹傑棟翬飛岳峙繚以朱闌  
覆以重櫺規制雄大氣象森嚴凡幕幣供帳之具黃金  
丹砂璀璨芬郁之飾視昔有加若天上良常化出人世  
川祇地媪咸大歡喜奴隸婦女瞻仰贊嘆誠足以侈廟  
貌昭神休矣工徒竣事士民相與共落之穉穉在野歌

舜在途休氣布濩無有蓄害人康物旱薰爲大和則又  
相與伐石以記其成主領觀事者彭堯臣介萬戶教化  
公來謁記余惟老氏之道原乎大易大易吾聖人憂患  
之作也老氏者其無憂患乎憫文法之煩稱也機譎之  
互角也百疾俱作萬惟橫生晝冥宵光夏霜冬雷罔不  
繆盭故其立教以自然爲宗以無爲爲有爲本返治古  
於容城氏時田不侵畔漁不爭隈託嬰兒於巢上棲餘  
糧于晦首虎豹可尾蛇虺可踰而不知爲之者此老氏  
旨也宗其教者又隆以昊天上帝之居巍巍觀闕與時

王等而王法無所於禁卽與泰壇郊祀者同一科儀亦  
以廣好生之仁充玄默之化也爲其徒者將推其教以  
拯衰世之苦則祖師之望又豈直祝釐以壽皇圖宮闕  
壇墠之崇又豈徒靡吾民力以侈外觀而已哉方今聖  
天子追治道於黃唐之上好生之德與天同流瘳瘼煦  
殘以恬以熙民有含哺而嬉鼓腹而遊老死而不知帝  
力之加於我者老氏之教可以因之而廣矣旣序其事  
復爲銘詩曰神釐戴■浮青紐水精宮闕神人宮金鋪  
雕礎固且崇參差珠閣當天中仰瞻■扈天人容天威

咫尺下地通白雲之鄉帝乘龍翩然大荒靈下降彩雲  
綺霧陞九重雲鶴萬舞來從東五方之人叩吉凶帝憫  
下土叩輒從物不疵癘歲屢豐十日一雨五日風聖人  
體天上帝同好生之德天同功祝聖人壽生總總倏倏  
之德還古蒙彌千萬年天無終

長興州重建學宮記

楊維禎

予客游吳興涉長城見其田野辟絃誦聲相聞入其境  
夜魚不取解篁簞間無嘯聚人郭挈壺氏之職謹孔聖  
之學斥而新焉問爲政則州長火魯忽達侯之化闢六

年而成矣未幾學者宿介吾學徒劉吳來謁學記曰長興吳夫槩王之城池也古爲縣今陞州學本邑人朱少傳劉公涉所建金匱焚餘自縣東徙今太平橋縣令趙汝譔建戟門杏壇萊桂堂張公明增建藏書閣而學之規始具我朝至治間州長撒都魯丁重修禮殿而堂閣門宇廢而不立者有矣至正五年州長魯侯至朔望必眎學宣布教條凡繫風紀者與淳師老德講行之州之士以文學儲采擇場屋者往往興焉然學之營繕事重民力未果十年夏六月侯始勸諸好義者捐俸金爲

倡知州韓公惟德起而和之贊事者校官三衢鄭友直  
儒之趨事者劉坦之吳鼎趙良珪董役者州史俞文罔  
也殿增而隆拓左右翼屋二中堂從廡及兩廡六齋靈  
星大成之門庖湑廩庫咸煥然一新堂陰復創亭曰光  
霽閱三月告成予歎三代之衰庠序之教皆苟焉也久  
矣漢爲近古其教無聞蜀得文翁立學始變鄒魯之俗  
東都興北州之學者僅稱常山宓恭耳況其下乎嗚呼  
三代而下學校之興廢固基乎循吏之得失也我朝州  
縣所在有學雖主教有官作養之效則寄守令守令非

人而欲學之教行亡矣學校之教尼而望風俗之變難  
矣朝家以教化責守令今侯以教爲治寬假歲年其效  
始著嗚呼吾是以知循吏之效之急于得人也吾是以  
知庠序之化又必久於其道而後成也文必而下不爲  
有繼乎朝家設學之意不爲無負乎民之望於大夫士  
者不在是乎是可書已侯字得之世家北庭平章保八  
公之適子也嘗游成均兩膺鄉薦所至風采政事皆有  
可稱道者云

順寧庵記

楊維禎

弁山之西南二十里而近又爲呂山實爲長興之名山而處士吳成叔氏世家焉山之靈不爲龍蛇虎豹之神梗楠豫章竹箭之材金錫丹砂之彩乃獨屬之於人焉孝友忠信以表其俗蓋自梁附馬十一世而處士出焉處士生丁世運之衰終身不仕遂生卜所居山東小崗得貞幹坐貞幹而西按葛阜諸峯茗水爲之帶者以爲真宅且預治精舍真宅所舍成旣以順寧命之而又以志文請於予夫存順而沒寧者橫渠張子語也存則動順其宜沒則靜安其歸而無所愧怍於時聞者聖賢之

能事也吾嘗獲交處士處士動靜云爲一委諸順而無  
一毫喜怒計較之私上有令子弟禪其家政左右賢友  
師講切聖人之學處士優游眉壽之堂以享其有餘年  
而復處士順寧之中非自中洞然處士人不能也夫人  
少而壯壯而老老而終春秋之道也畏終者往往謬用  
其心懷長調于千年不少止足雖營寸歛焦然不得以  
一息不寧爾也役聰明招聲勢雄才健力以闢其鄉而  
不知稅駕之所曷在也不亦處士處士順寧之所  
爲始終者吁遠矣哉故予樂爲之記且使時之不處士

者有所風動焉云爾

東湖書院修造田記

楊維禎

長興陳瀆里蔣義門氏德芳甫來謁余錢塘曰克明悼  
淵大家 既羸止又操狹取羸不止丁造物者忌羸與  
狹并喪後至亡噍類者不學過也克明承先人之遺休  
得以義名門教立塾里亡賴兒家有子弟志乎成德達  
皆皆吾先人之澤也於是東湖書院名于江浙八十有  
四之中者實克明伯父慶元主簿君之始創時至元二  
十四年丁亥也已捐田隸之二百五十畝山地一千七

十六畝至治辛酉克明從父居仁白于有司轉聞于中  
書得俾書院額泰定丁卯行中書省置山長一員至院  
主教事從父居仁暨必壽弟尋倡首益以田二百四畝  
山地二百八十四畝由是春秋祀事無闕庖廩之供什  
器之須與夫摹鈐書板之費靡不給足閱歲滋深殿堂  
門廡日就摧廢必加葺理克明懼費之侵于養也至元  
己卯復輟已田一百畝歸之別儲其入顓給修營造之  
費初爲要束毋以他用賑貸又懼來者之弗察也或變  
其成規則不可無言者規諸石也願先生賜之言余爲

之喟然曰古之書院禮義出也今之書院類出于名聞  
蔣氏之先修身起家立大宗法以合乎族屬斥浮屠教  
以樹乎喪祀禮義之宗也宜其家塾遺制獨去古未遠  
子孫如德芳者又纂承其先志而圖其所弗墜不惟無  
所靳又舍所有以利于人非敦乎義者不能也義之所  
在旣以名其門又以名其田又悉之于一井一塚一舟  
一梁之及蔣氏之義推而行之殆不可勝用吁豈惟賢  
于浙大家而已哉主簿蔣君諱必勝字質甫別號容齋  
起身教授高郵池州用資格序遷慶元以沒德芳出主

簿之嫡後仲氏運尚義而好學有主簿君遺風焉田山步畝鄉落詳列石陰不著

素履齋說

楊維禎

吳興呂生坦字安道又自命其讀書之室曰素履而請說於予予謂素履非簡淡寡欲廉靜以樂道者不能易之履曰素履往象曰素履之往獨行願也君子履其素而往非苟利也獨行其志爾苟樂道之志與利達之心同塗而交戰則不能履其素矣吾客吳興生挾冊從吾遊聽其言無巧辨詹其行無滯朋比德里閑以孝聞朋

及以信著可以占其素行者矣萬石君不言而躬行元  
質厚而少緣飾此古人素履之實也觀人不於其  
素履而於其外文未有不失者也六三之象曰跛能履  
不足以與行也士之素履不足其行也不遠何以異於  
跛哉非直跛也且蹈虎尾而有趾人之凶可不懼哉抑  
予聞履之爲卦物畜而後有禮故受之以履君子觀履  
之象辨上下使各當其分而在下者無有多上人者此  
民志之所以定天下之所以一也今民有盜弑長吏以  
爲悖者天下爲之騷然生素履而學優將有祿位於時

矣願加其定民志者如之何其可也

倪用宣字說

楊維禎

吳興倪生用宣父旣名之曰璨而字則屢更而未定也  
一字曰孟輝一字曰仲宣生皆以爲未盡又請字于予  
予曰魏王粲之字曰仲宣宣者粲之用也生之璨玉之  
有其實而後有其文有其文而後有其用也宣字曰用  
宣按說文宣從四風回轉廔宣陰陽也然則陰陽非  
宣亦不能妙夫一動一靜之用而況于人乎書曰日宣  
三德夙夜俊明有家詩曰王命召虎來旬來宣書言宣

之本詩言宣之州生既以閭廛受省檄將有爲政之由  
矣使無三德之日宣則何以受王命盡旬宣之職乎德  
之日宣者王之有其璨也王命之旬宣者璨之有其用  
也生以予言勉之字之日用宣宜哉

江浙平章三旦八公勲德碑

楊維禎

天監有德于我有元太祖應運肇基於朔世祖受天全  
付奄有四海紀綱法度內維外持聖子神孫百代丕纂  
其規宏矣遠矣承平百年禍無官闡威晚閭寺藩臣治  
極而變變職吏苛吏苛民亡藝極民無逃逃盜朱鬣赤

幘群燭汝頤遂挺旤江淞諸道兵縻集其能支至正壬  
辰秋直犯垣府封豕長蛇穴我宮廟食我倉庾蕩覆我  
比閭虔劉我牧圉七月庚辰杭陷維時疆場臣遁參政  
樊公執敬死之監司李蘭氏率東營士巷戰十日夜寇  
退無幾陷廣德陷吳興時平章三旦八公以宿望重臣  
膺天子明命統哈赤貴赤兀魯三衛軍專征江之南兵  
次于秀復被旨援建康杭以急告寇駭駭壓境將襲鳳  
口鳳去省治僅兩舍所公馬首不東杭重唱公以閫外  
制便宜卽日夜兼程抵杭鳳口實杭要隘九月己亥大

軍屯鳳口寇退據武康犬牙德清公遣部將率精銳前  
岐水陸進首尾蛇應繼遣突馬掠陣士氣百倍僞師  
生擒者數十徒皆倒戈相蹠血死庚子復武康十月辛  
丑師次德清公望氛知寇東奔亟要二覆裏去之戊申  
屯菁山俘賊將程琳輒釋不殺盡得其虛實狀庚戌陳  
去施橋亘蠡山寇迎敵大敗之壬子公草檄誓諸將會  
吳興曰蠡寇不滅無以身爲號令精肅雖指置散地勢  
不可拔兵不戰復吳興寇退守長興命驍將用驚馬陣  
直剿賊壘丁卯復長興十一月乙亥月火攻復泗安寇

奔方山諸將田空山南掩擊之丁丑繼進塔山寇有自  
北山覆圍官軍公挾兩曠騎親攝弓射賊皆應弦倒諸  
將破圍出殺屍亡笑餘逆皆警拜曰飛山真神兵也吾  
賊可與神抗耶遂潰是日復西安戊寅復廣德大索三  
日俘裔伏草倚禾飛走無遺公下令曰手無凶器卽吾  
良民宥而不殺者以萬計於是大資將士封積聚掩骼  
胔原註誤紓係累版授庶府官誠以文命申以鸚鵡聖  
訓使民知有逆順吉凶民用大悅班師日杭父老爭持  
牛酒壺殮先後道路咸驩呼伏地涕泗若喪家赤子重

見父母也明年春正月天子有命以徽饒寇復聚趣公  
南征越三月平徽以達于饒使俘裔散約而無亡矢遺  
鏃之費十五年公班師還省平南功奏天子申以錫命  
金帶赤舄彤弓鬱鬯升平章甘肅未行繼陞淮南濱行  
寇陷吳門秀以急告省大臣及將吏士庶咸挽留復統  
師平吳杭又藉以安由是父老祠公像且樹石紀勲德  
謁予文以登載某嘗錄公南征事狀未嘗不嘆公爲中  
興賢佐應運于天者也予讀江漢諸詩見宣王中興天  
必爲生賢佐方叔召虎是也一時勲德歌詠雅頌至今

猶赫赫然在人耳目若公之豐功鉅烈固將銘鼎彝載  
旂常與成周聲詩相爲不朽何有于杭片石哉爲之書  
者不過紀浙民恩私耳抑予悼他將臣當報國日乃或  
惻撓脆怯顛頓履跡者不抄公之勲烈不足立勸乎公  
字山堂飛山子其鐵甲兵號也西夏人自幼警悟博達  
載籍淹貫毀鈴善劍術騎射其佩上賜劔曰龍電劔云  
其屬將曰哈迷劉脫因韓拜老稱平南三傑其幕府僚  
曰李國麟葉伯顏僧家奴稱平南三俊器使諸英各獲  
其所故其麾下多名將幕中多名士其千夫長百夫長

沐浴風烈者不可以枚書銘曰天生蒸民孰亂我常吏  
用多辟哀彼訑殤哀彼訑殤毒穢我良魚然中土覃于  
震方聽我杭土故國天府實建南垣以控土宇墾我城  
池戕我牧圉民之觀瘠靡有定處天子曰咨咨汝臣旦  
維汝臣旦維國之翰分爾徒御徒御嘽嘽專爾斧鉞大  
劬龍電維杭鳳口杭要之括孰後孰先隙不容髮我師  
阨之寇衝以折支葉雖害本實未撥陂湖之淤赤幘朱  
纓具區長霄大艗小艇宅我水國湯我大城山猥野鹿  
跳踉滿庭王師南下克震克怒陸有驍馬木有犀兕如

竹之解如矢之注民大來蘇沛若時雨於乎小萌不知  
否臧貼薄詿誤弗念卒狂誕置懷宥毋淪胥以戕戎作  
用戒文告用章奉我聖訓曰鸚曰鵲取譬不遠俾民大  
若用我爲教不用我虐我用靡不承聖訓是假曰武曰  
文鮮不爲威彼卒出殛行出狗雞詛于其神武冠遏隄  
翔翔河上棄我六師天子賚功無越我旦父肅將天威  
旣執醜虜遏暴弔民無墊上下天監有元實生我旦父  
維嶽降神吉甫作頌臣禎繼雅肆好其風繫我旦父入  
覲上公旦拜稽首天子之功

石屋禪師塔銘

釋元旭

清珙字石屋蘇之常熟人也俗姓溫母劉氏生之夕有  
光寶宋咸淳八年壬申也及長依本州興教崇福寺  
出家二十祝髮越三年受具一日有僧杖笠過  
門師問之僧曰吾今登天目見高峯和尚汝可偕行否  
師欣然與之偕行見峯峯問汝爲何來師曰欲求大法  
峯曰大法豈易求哉須然指香可也師曰某今日親見  
和尚大法豈有隱乎峯嘿器之授萬法歸一之語服勤  
三年大事未明忽辭他行峯曰溫有暗驢淮有及菴宜

往見之至建陽西峯見及菴菴問何來師曰天目菴曰  
有何指示師曰萬善歸一菴曰汝作麼生會師無語菴  
曰此是死句什麼害熱病底教汝與麼師拜求指的菴  
曰有佛處不得住無佛處急走過意旨何如師答不契  
菴曰這個亦是死句師不覺汗下後入室再理前話詰  
之師荅曰上馬見路菴呵曰在此六年猶作者今見解  
師曰棄去途中忽舉首見風亭豁然有省回語庵曰  
有佛處不得住也是死句無佛處急走過也是死句某  
今日會得活句了也菴曰汝作麼生會師曰清明時節

雨初晴黃鶯枝上分明語菴領之久乃辭去菴送之門  
囑曰已後與汝同龕未幾菴遷湖之道場師再叅次命  
典藏鑰菴嘗與衆言曰此子乃法海中透網金鱗也一  
衆刮目以視後靈隱悅堂闇公會中居第一座遂罷叅  
登霞霧山築菴名曰天湖道洽緇素戶屢駢臻伏臘所  
須不求自至凡樵蘇之役皆躬自爲之有古德之風禪  
寂喜作山居吟傳者頗多師於此山有終焉之志俄而  
嘉禾當湖新創福源禪刹以師之名聞諸廣教馳檄敦  
請爲第二代住持師堅卧不起或者勸之曰夫沙門者

當以弘法爲重閒居獨善何足言哉於是奮然而起大開鑪黼鍛鍊學者談者以謂真能起及庵之家者也居七年以老引退復歸天湖至正間朝廷聞師名降香幣以旌異皇后賜金襴衣人皆榮之師澹如也至正壬辰七月廿有一日示微疾閱二日中夜與衆訣其徒請曰和尚後事如何遂索筆書偈曰青山不著臭屍骸死了何須掘土埋顧我也無三昧火光前絕後一堆柴擲筆而逝聞維舍利五色粲然不知其數其徒收其靈骨舍利塔于天湖之原以及庵之塔配之示不忘同龕師之

意也壽八十有一臘五十有四有弟子愚太古高麗人也親得師言說偈印可有金鱗上直勾之句其王以國師之號尊之聞師道行意甚傾渴表達朝廷詔諡佛慈慧照禪師移文江淞請淨慈平山林公躬入天湖取師舍利館伴歸國平山與師爲同叅皆愚公之本意也師之上堂法語山居詩頌其徒至柔刊行于世且以師之行狀徵予銘之予昔見師于福源臞然其形道韻可掬今已四十餘年矣因感樂而爲之銘銘曰

西來直指教外別傳惟上根者乃可得焉傳亦無得

亦無得如太虛空蕩焉罔極卷卷石屋心如死灰剗然  
頓悟火裏蓮開惠朗之孫及菴之子源清流長根茂實  
遂跡留霞霧名烈湖江爭先快覩景星鳳凰人滅至今  
幾三十祀雙塔巋然清風未已

題良常草堂疏

捐捨趙榮祿正書一卷

倪瓚

昔王錄事寄少陵之資近代趙文敏于岳氏之助皆有  
實效不事虛文今德常欲構草堂所求者柯張桂三君  
或宿諾而寒盟或解嘲以調笑邇求其實則罔所知數

年之間三君已矣草堂適成載覽標題重增嗟悼捐予  
珍秘永鎮新居

跋環慶王氏所藏趙榮祿六帖

倪瓚

右趙榮祿與覺軒先生手簡共六紙有以知交誼之深  
家世之舊也先生學行純正爲宋琅琊王仲寶之後仕  
至蘭谿州判官今獲觀于其孫光大之彞齋老成典刑  
不可復見矣尚賴翰墨文章有以想其風流哉庚子二  
月十日倪瓚題

筆卦有叙

宇文軒

筆之行事昌黎伯毛穎傳可考已予復何言哉然予嘗讀孔子易至十三卦之制器尚象若罍罍耒耜弧矢杵臼舟楫之利與夫宮室衣裳棺槨書契之制皆古聖人取諸卦而作也何獨於筆而遺之耶况筆之爲器上而帝王之典謨訓誥下而官制之簿書期會四海之同文殊譯莫不賴以纂錄其功不下於罍罍耒耜弧矢杵臼舟楫宮室衣裳棺槨書契也何獨於筆而遺之也耶或曰筆之名始於秦氏其不見稱于孔子易也固宜予曰不然筆不始于古乎則庖羲氏

之八卦夏后氏之九疇凡科斗鳥跡鐘鼎籀篆之文  
亦將何以施其巧哉若然則筆之名雖始於秦氏其  
所由來則遠矣乃不見稱於孔子易者其在夫夫之  
書契也與吳興筆者陸生索予文以銜其技竊謂包  
犧氏畫卦之物卽筆之所由兆也因著是說并作筆  
卦以贈之

三筆元亨利用書貞吉彖曰筆聿也剛柔合而成內虛  
而外健柔得中而順行應乎剛而文明是以元亨利用  
書貞吉書契筆而天下治也春秋筆而亂臣懼也筆之

時用大矣哉象曰天下文明筆先王以作書契代結繩  
初九田於林臯獲兔拔毛以其彙征吉測曰獲兔拔毛  
大有得也六二淇園伐竹用資簡牘測曰淇園之竹虛  
而直也用資簡牘言有實也九三秉筆濡其墨王用亨  
于三畫大吉測曰三畫之吉其文立也九四隕筆不利  
入於場屋有悔測曰隕筆有悔其行塞也九五利見大  
人天下同文測曰利見夫人居君側則天下同文小人  
黜也上九筆顛刺不資錄其形禿終凶測曰筆顛形禿  
任之極也

大元故翰林侍講學士中奉大夫知制誥同修國  
史同知經筵事贈中奉大夫江西等處行中書  
省叅知政事護軍追封江夏郡公謚文獻黃公  
神道碑

危素

至正十七年閏月丙午翰林侍講學士中奉大夫知制  
誥同修國史同知經筵事金華黃公年八十有一薨于  
家是月己未其孤梓與門人劉涓王禱等葬於所居義  
烏縣東北三里崇德鄉東塾之原明年以門人翰林國  
史院編修官同羈宋濂之狀至京師臨川危素銘其

神道之碑素宦學京師辱公爲知己公入直翰林素爲  
供奉同日命下及遷宣文閣授經郎從公於經筵有詔  
修后妃功臣傳素復爲供奉從公於史館居則同巷嘗  
舉酒相屬曰吾死子其銘吾墓嗚呼孰知卒承公千載  
之託哉公諱潛字晉卿姓黃氏世居婺曾祖夢炎仕至  
樞密院編修官以朝請大夫致仕祖塢承節郎以公貴  
贈禮部尚書父鑄將仕郎累贈江淞行省叅政護軍初  
朝請之外孫女王氏歸淞西提舉丁公應復實生叅政  
府君及禮部府君以疾廢故朝請以爲其後妣童氏公

之在妊二十四月始生母夢大星煜煜然墜於懷生甫  
辟卽自免乳祖妣徐氏撫之比成童倍誦書詩迨學爲  
文下筆頃刻數百言著吊諸葛忠武侯辭前太學內舍  
劉君應龜朝請公之外孫也見而嘆曰吾鄉以文鳴者  
喻叔奇兄弟耳稍加工其不與之抗衡乎因留受業弱  
冠遊虎林故都之文獻具在咸得徵焉大理卿牟公懌  
期公甚遠歸從僊華山隱者方君鳳遊爲歌詩相倡和  
絕無仕進意其友葉君謹翁力輓之出大德五年春舉  
校官七年舉憲史皆中其選已而復退隱于家延祐元

年貢舉法行縣長吏強起就試作太極賦傳于世明年  
殿試對策以用真儒行仁義爲言賜同進士出身授將  
仕郎台州路寧海縣丞縣地瀕于鹽場而亭戶恃其不  
統於有司厲民爲甚編氓之隸漕司洎財賦府者尤爲  
橫暴公皆痛繩于法吏因以利害白弗顧也有後母與  
僧通而酖殺其夫者反誣夫前妻子所爲獄將成公變  
衣冠陰察之具知其奸僞卒直其寃遠近以爲神明巡  
兵捕盜販者急遂沈鹽於河帥衆以拒巡兵怒爲取他  
私販事以實之民有在盜籍者謀乃刼殺未行邑大姓

執之以圖中賞格初無獲財之左驗事皆久不決公爲之疏剔以其獄上各論如本條免死者三十餘人却使者董公士恒行縣廉知治狀事悉諉焉公爲黜其以賄敗者軍百戶一人縣吏二人在官無祿者四十餘人愚民愬婚田鬪訟下其狀多至數十百公錄其當問者一經論定翕然畏服不敢重有詞世以法家自名者有弗如也歲大旱禱於龍秋大雨境內有年踰再期會有詔改鹽法江浙行省承制遷石堰西場監運命仍舊階石堰視諸場爲尤難居是官者嘗以稱盤折閱及不能檢

防私鬻被譴公規措有法無分毫入於吏議閱四載以  
功超一資升從仕郎紹興路諸暨州判官新作捕盜司  
巡海官船例以三載一新費出於官而責足於民有餘  
則摠其事者私焉公泄是役搏節浮蠹還其餘錢爭驩  
呼而去奸民以僞鈔鈎結黨與脇攘人財官若吏聽其  
謀挾之以往鄰境諸縣株連所及民之破產者數百家  
府俾公鞠治官吏除名同謀者各杖之百捕盜卒陰真  
僞鈔板於良民家乃白於官往索之惡少年持挺從者  
幾百人公遇諸野詰儻人曰弓卒額止三十安得此曹

耶可縛送于州皆相率遁去有盜繫錢塘縣獄遊民賂獄吏私縱之假署文牒發來爲之鄉導逮捕二十餘家公疑而訊焉悉得其情以正盜宜從重議持僞文書來又非州民俱械送錢唐誣者自明奉省檄監稅杭州僅三閱月增羨錢十二萬緡至順二年用馬文貞公之薦召爲應奉翰林文字同知制誥兼國史院編修官進階儒林郎扈從至開平作紀行詩十有二篇世盛傳之丁外憂去官服闋轉承直郎國子博士未始以師道自居輕納人拜所親厚者業成而仕皆有聞於時時欲移禮

殿四配位東坐西嚮學官欲議分置於左右同列不敢  
爭公獨面折之其人恚甚日坐堂上以危言相加御史  
斥其無禮乃竟如公言居六年請補外換奉政大夫江  
湖等處儒學提舉年六十有七不俟引年亟上納祿之  
請俄有旨纂修遼金宋史丁內憂不赴服除以中順大  
夫祕書少監致仕居四年中書右丞朶爾直班公今中  
書左丞相太平公力薦之命落致仕仍舊階拜翰林直  
學士知制誥同修國史至正七年六月至上京中書傳  
旨兼經筵官召見慈仁殿上語朶爾直班曰文臣年老

正宜在朕左右八年夏升侍講學士中奉大夫知制誥  
同修國史同知經筵事修后妃功臣傳數被金幣之賜  
上章求歸田里不俟報而行上聞之遣使者追及武林  
驛敦迫還職十年夏始得謝南還江淞丞相達世貼睦  
邇公承制起公商議中書省事以疾力辭其薨也士林  
爲之傷悼所著文集三十三卷義烏志七卷筆記一卷  
公娶王氏累封江夏郡夫人先一年卒子男一人梓也  
杭州路同知海鹽州事女一人適惠州儒學正陳克讓  
孫男四人瑄琛瑋珣公天資介直博極群書而約之於

至精有關經史疑難古今因革與夫制度名物之屬旁  
引曲證疊疊不能休至於剖析異同讞決是非多儒先  
之所未發見諸論著一根本乎六藝而以羽翼聖道爲  
先務然其爲體布置謹嚴援據精切俯仰雍容不大聲  
色譬之澄湖不波一碧萬頃鼉鼉蛟龍潛伏而不動淵  
然之色自不可犯凡典冊詔令銘述功德多以命公他  
求文者日盈於門力麾之而弗去雖絕域殊邦亦皆知  
所寶愛性篤孝親沒營冢域於三畚山有乳虎馴狎之  
異月旦望必展省大暑寒不易先世遺文歲久頗有殘

缺極力搜討補綴成編在州縣清白自將所至無圭田  
鬻產以佐其費在朝不事造請逢覃官者一減資者五  
銓曹或失於收叙亦不自言與人交無鉤距不事矯飾  
以爲容悅而誠意獨懇至然剛中少容觸物或弦急霆  
震一旋踵間煦如陽春曾不少留礙焉素寡嗜欲甫四  
十卽獨榻處外及登法從蕭然不異布衣時遇佳山水  
則觴詠終日忘去世之議者謂公操行孤潔類陳履常  
文辭嚴簡類王介甫筆札俊逸類薛嗣通第非真知者  
未數數然也銘曰

黃出春申著於金華或徙豫章蔚乎名家定居烏傷當  
宋中世故笏有傳在其來裔仁宗御極拔擢俊英公起  
南土對策明庭精敏之才中試州縣供奉詞林陶鑄時  
彥迺振文鐸蚤懸其車召還經幄載筆石渠皇眷甚隆  
宦情彌薄掛冠歸休翺翔寥廓維昔文節學行允臧代  
序雖遠聲華相望老成淪亡公則著蔡文獻之承來者  
攸賴八十考終是爲歸全述銘著德東塾之阡

宜興無極導禪師塔銘

危素

宜興中隱院沙門祖訓年且九十以其師導禪師塔銘

爲請稽諸事狀瞿然而驚曰孝子其何可以不銘禪師  
宋宗也系出某諱某母計氏素慕佛乘咸淳四年十月  
將誕夢白光盈室者三夕師之生未嘗啼哭北兵至母  
攜之匿苦中遊兵徧索之得母去父從求之不得且死  
某氏憐其孤兒育于家稍長常語人曰誰無父母吾父  
死將奈何母之俘當北行吾願畢此生以求見不然何  
以生於天地間啼泣誓於觀音大士旦暮必二千拜期  
以見父母凡藝事苟可款曲語近人情者雖至汙賤甘  
爲之或又隱於刀鋸以遂其志走十寒暑至河間之樂

壽縣有老翁指其處蓋貴宦家既見母久不能辨師乃稱已乳名與內外族嫺抱持慟哭觀者咨嗟涕泣他日請母南還母曰吾不幸至此朝夕禱上帝乞歸此非不富貴從汝歸死足矣然居此久人素敬我當徐圖之踰年終言于官而後奉母以行因請曰母子相離二十有三年幸而見母皆佛菩薩力乃製竹輿坐母其上負戴以行十步則輒爲五禮拜至補陀落伽山而返仍薙髮報其親從鐵山璠公於廣德東山得度禹步咨叩玄要深坐崖菴晝則以管夜則霜露凝寒虎跡交前皆弗顧

及菴在道場山待冊進見益奮烈堅忍脇不傳席過杭  
之淨慈值無有元公與師語噐之後泛舟湖中聞漁歌  
脫然有省遽還謁元公隔窓聲曰這裏無你棲迹處師  
拂衣去尋築慈照菴於弁山之陽毋以念佛三昧終旣  
薨一夕空中有白衣人語曰緣在宜興乃得王峯於宜  
興萬山之中建寂照禪院間過郭門東北顧祖訓云斯  
爲吉壤况當通道遊方者有所歸宿卽走作中隱院有  
妙雲祥公首捐小屋與基州將脫因君力贊之拓其地  
義士蔣贊徐士滿等爭致財粟院成師亦多來居之浮

圖師爲大司徒號曰定惠正覺明悟禪師至順三年正月六日召大衆垂示法要趺坐而化闍維舍利無筭分塔于寂照中隱世壽六十五僧臘三十人德間璠公道行三韓元公其同門元公嗣無門和尚師固有承傳及師之沒祖訓未嘗少忘以至本清善良善新善伏等莫不協恭上下雍睦無間遇之不問可知爲師之門人兵革之變骨肉離散世以爲常若師之堅苦以求其毋不數數然况望其真叅實證悟徹大乘耶然則師不獨以孝稱之矣乃爲之銘銘曰

建炎渡江乘六龍維城布護多其宗吳興近輔支幹降  
熊羆奄至迅如風孤兒父母逃苦中父死母俘兒莫從  
天長地遠河山重呱呱夜哭天蒙蒙皈依大士極嚴恭  
隱身刀鋸與母逢十年瀛州觀音容迎歸名雪歡聲同  
一朝翦髮辭樊籠禪林扣擊師璫公歛令漁歌萬念空  
前後際斷無初終西遊荆溪隱玉峯寂而能照真圓通  
巖巖兩塔樹柏松史氏著銘示無窮

送丁山長序

戴良

古者學無常師名一人爲師而其餘皆如弟子焉者今

之學官是也然求其稱是職而無愧不亦難哉江南科  
舉盛時蓋嘗有議之者其說以通經義能辭賦爲稱職  
至辛巳之歲科舉旣輟而復行朝廷遂著令以鄉貢下  
第者置郡學正及書院山長則庶幾議者之遺意而其  
效之淺深則又係諸其人而非法之罪也丁君子儀嘗  
以書經中江浙鄉試上名于是南北阻兵道里不通欲  
貢之春官未能浙省丞相便宜授吳之甫里山長吳爲  
浙中文獻之邦游儒奇士冠摩而轂擊居學官者爲尤  
難子儀倚席于此以其學于已者淑諸人不爲新奇以

取名不爲昏誕以徇俗使賢而才者有所據立愚不肖者有所化而改至于事上接下之密勾稽錢穀之嚴繕修屋舍器物之備時人以爲能者在子儀則其餘事耳以故縉紳常布之士識與不識皆不謀而同聲曰此固通經學而能辭賦者也此固稱其職而無愧者也亦既在官五載受代而歸訓導張某金某以余嘗提舉儒學知子儀爲特深又且舍子儀之館與子儀交最密是以來請文以贈余不得辭抑余私有贊子儀者子儀爲湖之秀彥而湖則安定胡先生之所教也安定教湖學時

嘗置經義治事二齋以淑其人士如治民治兵水利筭  
數之類亦皆在所當習是則安定之爲教也似不止經  
義詞賦二者而已耳子儀去安定雖稍遠然流風餘澤  
被于是郡則其得之安定者深矣繼茲以往法當教授  
一郡子儀尚毋以今之稱其職者爲已足而益求安定  
之所以教湖學者而致力焉吾徒其庶幾乎湖隄太守  
陳君元禮余友也子儀歸以余言質之其將有發也夫

跋錢舜舉所臨閬立本西域圖

戴良

此吳興錢舜舉臨唐閬中令西域圖中令藝絕古今張

彥遠記歷代畫第爲上品而西域圖實在所錄也蓋當  
是時天下已定而外國初入貢故詔中令寫外國圖而  
于西域則奉詔其真蹟有李伯時題識者舊藏廬陵王  
侍郎家大觀間詔取上進廬陵令張達淳輩竊取摹之  
于是有摹本彥遠又云當時王知慎亦嘗一摹榻而海  
外高麗等國往往有唐摹則此圖之傳世非特一本矣  
第不知舜舉所臨者果自真蹟中來耶抑亦摹本之所  
出耳因茅元禮攜至求題姑志所聞如是博雅君子必  
有能論之者

跋趙文敏所臨蘭亭序

戴良

前輩論逸少筆迹真者當祖之臨者且子之既鐫之石而又摹臨之者其屬猶近繼此蓋遠矣文敏所臨本豈屬之近者非耶然傳之于世真贋常相半此本舊藏四明袁德平家文敏與德平友善故書以遺之奉化陳士申慈溪孫原道皆德平姻家子原道得之于士申而士申得諸德平前後相傳不出他族其爲真蹟無疑也原道與弟原理皆善書其必知所珍矣

贈吳興筆工

無名氏

文闢用三日之長競誇藻麗筆陣快千軍之掃須藉選  
鋒矧此某人之良工真有蒙恬之妙訣得心應手自圓  
健以尖齊擗管揮毫任縱橫而曲直以此爲鑒戰之具  
便可施脫穎之才明經旨而學總聞龜工詞賦而文形  
起鳳一掃波瀾之勢更令風雨之驚今秋鶚表書名當  
檀如椽之譽異日鑾坡賜對更膺視草之榮